



Cuira, ils 28 d'october 2023

Communicaziun a las medias

Radunanza da delegadas e delegads da la Lia Rumantscha a Vella

Sonda, ils 28 d'october 2023, ha gì lieu a Vella la radunanza da delegadas e delegads da la Lia Rumantscha sut la batgetta da las copresidentas Urezza Famos e Gianna Luzio e per l'emprima giada cun il nov secretari general Markus Solinger. En il center da la radunanza è stada la transformaziun digitala e l'intent da rinforzar la communicaziun tranter las uniuns affiliadas e la cuminanza linguistica. Suenter las tractandas statutaras ha gì lieu in concert da la furmaziun RODAS cun Corin Curschellas, Patricia Draeger e Barbara Gisler.

Sonda, ils 28 d'october 2023 èn 42 delegadas e delegads e numerus giasts stads preschents a la radunanza da la Lia Rumantscha a Vella. Ella ha gì lieu en preschientscha da Daniel Solèr, il president communal da la vischnanca da Lumnezia.

Las fatschentas statutaricas èn vegnidas approvadas unanimamain. Durant la discussiun davart il rapport annual han las copresidentas Urezza Famos e Gianna Luzio menziunà las activitads da l'onn 2022 ch'èn vegnidas realisadas sco p.ex. la fundaziun da las quatter cuminanzas rumantschas en la diaspora ordaifer il territori tradiziunal da la lingua, numnadamain a Berna, Lucerna, Son Gagl/Appenzell e Winterthur, sco era la coordinaziun iniziada en connex cun la transformaziun digitala. Il copresidi ha suttastritgà l'impurtanza da cuntinuar cun la transformaziun digitala.

Accents per l'onn 2024

En il center da l'interess da la radunanza da delegadas e delegads da la Lia Rumantscha èn stadas las activitads ed il preventiv per l'onn 2024. Markus Solinger – ch'è dapi il 1. d'avust 2023 il nov secretari general da la Lia Rumantscha – ha preschentà sia persuna e sia bilantscha sco secretari general suenter prest 100 dis. En sia preschentaziun ha el accentuà intginas activitads dal 2024, p.ex. l'intent da rinforzar la communicaziun tranter las uniuns affiliadas e la cuminanza linguistica, ma era la transformaziun digitala. Per incumbensa dal chantun Grischun e la Confederaziun realisescha la Lia Rumantscha ensemen cun partenaris instituziunals ina coordinaziun strategica per las activitads sin il champ da la transformaziun digitala dal rumantsch. Uschia sviluppa ella l'onn 2024 ina survista da las activitads e dals projects actuals sco er ina prioritaziun correspundenta dad intents futurs. Quella fa vesavel las prestaziuns dals purtaders da projects ed in eventual basegn per meds supplementars per pudair realisar ulteriuras applicaziuns che sustegnan il diever dal rumantsch en il mintgadi. Medemamain sut l'ensaina da la transformaziun digitala ha Roman Pfister, president da l'Unìun da las Rumantschas e dals Rumantschs en la Bassa, preschentà il project «chalender.ch», in chalender digital che duai rimnar tut las occurrenz rumantschas sin ina plattafurma.



In ulteriur accent da l'onn 2024 cumpiglia ina sensibilisaziun intensivada da persunas novarrivadas en il territori rumantsch. La Lia Rumantscha animescha l'onn 2024 las vischnancas da realisar inscuters cun novarrivadas e novarrivads e porscha a questa gruppa en mira cundiziuns spezialas per curs da rumantsch. Plinavant cuntinuescha ella ensemen cun las vischnancas e las trais uniuns affiliadas territorialas da beneventar uffants novnaschids cun in'acziun speziala che metta en il center ils aspects positivs dal rumantsch sco lingua materna.

GiuRu en pitgiras

La Giuventetgna Rumantscha (GiuRu) è s'adressada cun ina brev a las uniuns affiliadas da la Lia Rumantscha: d'ina vart na saja betg reussì ad ella da chattar novas persunas per sia suprastanza (da preschent sa cumpona quella d'ina cassiera e d'in assessur) e da l'autra vart hajan els en general fadias da chattar gliעד ch'è pronta da s'engaschar activamain en l'uniun. Cun questa brev dumonda la GiuRu sustegn, saja quai en furma d'ina discussiun u d'impuls. La Lia Rumantscha sustegna activamain quest agir da la GiuRu ed è fitg interessada da porscher agid a l'uniun da la giuventetgna rumantscha ensemen cun las uniuns affiliadas .

Approvaziun da la revisiun parziala dals tschentaments

Cun gronda maioritad han las delegadas ed ils delegads approvà ina revisiun parziala dals tschentaments da la Lia Rumantscha. Cun l'approvaziun vegn adattà l'artitgel 15 che regla la convocaziun da la radunanza da delegadas e delegads en quel senn che la radunanza ha lieu da nov l'emprima mesada da l'onn empè da l'october. Plinavant è vegnì agiuntà in artitgel 37a Conclus che stipulescha che decisziuns pon vegnir prendidas era per via circulara u cun agid da conferenzas da video en in cas extraordinari sco p.ex. las restricziuns durant il temp da corona.

Concert da la furmaziun RODAS

Per engraziar a tut las persunas che s'engaschan di per di per il rumantsch ha la Lia Rumantscha envidà sonda suentermezdi ad in concert da la furmaziun «RODAS» cun Corin Curschellas (chant e percussiun), Patricia Draeger (accordeon) e Barbara Gisler (cello). Il trio da dunnas ha sunà e chantà chanzuns popularas da qua e dal lontan.